

## Lesing 105 – 5 Julie 2022- Die Laatreëns vir Dogter van Sion Bruid

Openbaring 128 ontvang deur Daniel Grobbelaar op  
27/11/2019

“Weer en nogmaals weer sal EK, JaHWeH van die Leërskare, JAHSHUA van die Huis van IsraEL en die Huis van Judah, spreek tot elkeen wat hulleself voorberei vir die Dag van Paardekraal, om Ons Gelofte van Bloedrivier te herdenk.

EK sal geensins ligtelik omgaan met MY Beloftes en met Ons Geloftes en Verbonde wat EK met julle aangegaan het nie! Wee diegene wat kom na MY op hierdie Dag met ‘n dubbele hart, net om deur andere gesien te word. Want julle offers van valsheid en bedrieglike harte sal EK nie aanneem nie. Hulle wat kom en vergader saam hulle volksgenote op die Dag van Ons Gelofte, maar wat wraak, afguns, liefdeloosheid en verraad in hulle harte ronddra se teenwoordigheid sal gesteur word met ‘n gees van onrus en oordeel, omdat ‘n dubbele hart en ‘n valse offer MY nie aangaan nie.

EK herinner julle aan Abel, wie se offer EK aanvaar het omdat HY suwer in hart bevind was; en Kain wie se offer EK nie aanvaar het nie, omdat hy met ‘n dubbele hart tot MY genader het.

**MY Huis van Filadelfia, MY Dogter van Sion Gemeente!** Hoor en luister na julle MAKER en Ewige VADER. EK het die Fondamente van Sion opgerig en die Pilare van die Huis wat julle vir MY opgerig het tot dusvér, gemeet. MY Dogter van Sion, weet dat dit EK IS wat in beheer is sovér julle dit toelaat. Julle loop al ‘n lang pad saam met MY en deur die winters en somers het julle deurgetrek tot waar julle nou gevestig is. EK was altyd by julle en het julle geleei in MY Waarheid, Geregtigheid en MY LIEFDE. EK het julle tot verder geleer oor **MY LIEFDE BO ALLE LIEFDE**. Maar, deur die lewensweg en paaie van julle soekie na MY het MY teenpool **valse profete na julle gestuur** en valse boodskappe het na die deure van julle harte gekom. Sommige van julle het die deur toe geopen, terwyl EK deur MY Gees julle verbied het met ‘n sagte Stem vanaf MY Waarheid. EK het dit toe toegelaat sodat julle ‘n langer weg deur die woestyn kon trek omdat EK nie teen julle vrye wil inwerk nie en om julle die Wysheid van Onderskeiding te leer. Daar was misleiding en daar was onsekerhede wat hoog uitgestyg het in julle harte. Julle het geworstel om by MY, die LIEFDE, uit te kom en om die WESE van LIEFDE te begryp, te verstaan en die LIEFDESDADE daaruit, te doen, spreek en te dink.

Daar was ‘n tyd wat EK MY kneg wat hierdie Woorde van MY aanteken, gewys het hoe daar ‘n groot **aardbewing** kom tydens die Sewe Dae Verootmoediging. EK het dit toegelaat om julle weereens te beproef, **hoe suwer is julle Goud?** Sommige se harte het van die Gilgal-Laer **gewyk** en andere se harte het **gestruikel**. Andere se harte het **donker geword** en andere se harte was harte van **dubbele weë**. Maar daar was en is harte wat MY bo alles begeer en wat MY as die Ewige GILGAL-LAER sien, terwyl die klippe, die wiel en die boom net ‘n afbeelding is van die

Hemelse Skepping wat EK met MY Skeppingsleermag opgerig het. **Die Stad van Gilgal is ‘n hele Koninkryk van vele van MY Koninkryke** wat EK met MY Wysheid gegrondves het. Net soos die Tabernakel van ouds in MY Volk Israel ‘n aardse afbeelding was, net so het Johannes die Hemelse Tabernakel gesien wat EK aan hom openbaar het.

MY Dogter van Sion, julle vir wie EK baie voorberei het en steeds voorberei, wees gewaarsku om nie na die profete van valsheid wat weer na julle toe sal kom, te luister nie. **EK wek MY profete op en na MY Stem deur hulle moet julle luister** en ag slaan op die Stem van Waarheid, maar wee julle wat sal val voor die voete van die valse gesalfdes en valse profete! MY Dogter van Sion, jy het al gestruikel en hard gesoek na MY. Julle het hard daaraan gewerk om julle elkeen se ou leerstellings van die wêrelde te laat sterwe in julle self.

Die Aardbewing was die begin. EK begeer dat julle, MY Dogter van Sion, nog fyner gewas sal word en nog dieper gesuiwer sal word, omdat EK, jou Bruidegom, ‘n **Suwer Vrou en Bruid begeer** wat met MY sal verenig. Die Tweede Paardekraal is op hande en EK sal julle dieper inlei in die Verborgenhede, maar let daarop dat julle nie hoogmoedig word ter wille van al die Kennis en Wysheid wat EK vir julle sal skenk nie. Wees nederig en sag soos ‘n Moeder wat na Haar MAN luister en HOM liefhet, net soos HY Haar liefhet. Die ander gemeentes is ook op soek na MY, maar struikel omdat hulle verkeerd soek.

Maar Jy, MY Dogter van Sion, vind MY elke dag! Broers het gestruikel en susters het geval. Sommige het voorgegee dat hulle saam met Gilgal is en andere het gedink hulle kan in die duister handel sonder MY, terwyl EK klaar alles gesien het. Andere het saam geloop met oë wat loer om te vervloek en te verraai. Andere het nie tot hulle broers en susters genader in tye van benoudheid en hartseer nie. **Die Aardbewing was die toets MY Dogter!** MY Dogter van Sion, daar is twee, gaan na haar en gaan na hom en bring genesing voort waarmee EK julle sal lei in julle harte.

Kom vra MY. Daar is baie broers en susters wat smag na LIEFDE en wat honger na naasteliefde en ondersteuning. EK het gesê dat EK sal alles weer herstel, en so sal dit wees! Al neem dit nog veertig dae in die woestyn! MY kinders wil EK terughê en MY Kudde wil EK versamel, MY Dag van die Grimmigheid van JaHWeH is op hande. Genees julleself, genees mekaar en loop nie rond met dubbele harte en koester nie wraakgerige gedagtes nie. **Die wat verkeerd gehandel het, gaan en stel reg, genees en vergeef!** Daar het baie gestruikel, maar deur MY Barmhartigheid en Liefde het EK hulle gedra en so dra EK julle elkeen ook. Doen alles in opregtheid en oophartigheid! Eenhartig nie dubbelhartig nie!

Raadpleeg MY ten eerste, dan wees gehoorsaam, dan word julle geseën vanuit MY Ewige Koninkryk van Lig, Lewe en Liefde!